

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

1 ¹Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús rîi. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ûquĩ turã ndiqui bei jêje. Sã ûquĩ ndiqui jembia bei.

Jesús jêicuate quia ûquĩ

²Gracias, ure bei quia Dios je jeniã ã. Jê ja rîi. Ure ñee mose Dios je, jeniã ño ureico nguiã ñee ñee ee ã. ³Jesús jêicuate quia ûquĩ. Nyebe jêingo beite nguiã mbae turã ndese ûquĩ. Jenyesequate quia Jesús rese ûquĩ. Nyebe jêingo nguiã Dios cheẽ nenei nenei mbei mbia je ûquĩ. Jesús nyebi sí mose, ûquĩ ño jêsaarõ arõ u nguiã hue. Jeñimbirãcuã tuchi equia eraarõ arõ ûquĩ. ⁴Seresenda, Dios riqui nyesequa tuchi jendese co. Dios que jêirabo umbaerã nda. ⁵Dios cheẽ turã ngue uresenei senei nguia jêje ra. Urecheẽ achõ je eã. Espíritu Turã abe que jembaaquiatu quiatu ra. —Ichõño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. Ûquĩ ndese que jêingo mae nda. ⁶Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbia icuã icuã mose jêje que Espíritu Turã ndiqui tuchi jendese ra. Jembia tuchi sacuã. ⁷Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbia que jirandu ja quia jendese ra. —Dios icuasa rei ûquĩ, i equia jeniã ûquĩ. ¿Mbaerã nda Dios cheẽ asenei ee re? Jembiirandu

turã ngue eno. ⁹Ūquĩ nguia ñee turãte nguĩã jeniĩ ũquĩ. —Tsalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniĩ ũquĩ. ¹⁰—Tsalónica jenda chi Jesús raarõ arõ huee. “Tu ra nyebi ibate si”, i u huee, i equia jeniĩ ũquĩ. Jesús rei Dios reco riirĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbia icuã mbasi mose.

Dios cheẽ uresenei tuchi jêje

2 ¹Ureso choño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ²Ureso que Filipos nyii ra. Hue jenda que mbia icuãte riqui ure je ra. Ureiruã nua ngue ra. Ūquĩ jêicuate quia ũquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbia icuã tuchi raque ure je. ³Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiiĩ irĩ eã. ⁴—Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbia mbia sacuã eã ño ureico nguĩã Dios cheẽ nenei nenei jêje. Dios mbia sacuã ño ñene. Dios riqui mae mbeite urechiangui renda rese co. ⁵Urecuasú que uresaã saã eãte quia jêje ra. Urecheẽ ñooño eãte que equia jêje ra. Jembiiĩ irĩ eãt e que ureico quia ra. —Sã mbia mbae mo mee mee ure je, ure eãte que equia jembiiĩ irĩ nda. Dios riqui maete urerese co. ⁶—iJenderecuarã nda ure cote jê! ure eãte que equia jêje ra. Ure eãte que equia mbia mo abe je ra. Cristo chimondó raque ure, echeẽ nenei nenei sacuã jêje. ⁷Ureico turã ngue equia jêje ra. Sã esi mo ndiqui nguiĩ nderequia turã, eĩ ure chõ ngue equia jêje ra. ⁸Urechesequa tuchi que equia jendese ra. Nyebe Dios cheẽ achõ eã uremee nguĩã jêje. Mbae ja uremeese rete raque jêje.

⁹Urechisaã saã ndese que jêingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguĩã. Nyaashĩ mose achõ eã ngue ureico mbae raa naa nda. Itondaru mose ab e que ra. Ĩ nda je mbae jemondoã ure je. Ure Dios cheẽ nenei nenei mose jêje. ¹⁰Jesús icuasa chõ jê cote re. Urecuata turãte que equia jêje ra. Jemae ngue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹Jendu rã ngue ureico jêje resẽ. Sã emo ndiqui nguiĩ mundua turã no. Sã emo ndiqui nguiĩ mbucuata turã no. Eĩ si chõ ure re. Jemundua ndua. Jembucuata turã nonde. ¹²Urecheẽ tuchi que equia jêje. —Dios quiato chõ jê cote re. Nyebe jêingo nguĩã Dios mbia beite cote. Dios que jêirabo ra. Dios ra jenderequa tuchi cote. Dios ra uturã mee jêje, ure beite que equia jêje ra.

¹³Gracias, ure bei equia Dios je jeniî a. Dios cheẽ nguiatu ngue jëisi turâte nguiã. Ure Dios cheẽ nenei nenei mose jêje, jëisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra. ¹⁴Sã judíos icuã icuã Jesús quiato Judea jenda je no. Eî si chõchî mbia icuã icuã jêje no, Seresenda. Jê ji jenda chõ eicuã icuã ndiqui nguiã jêje Jesús riî ùquî. ¹⁵Judíos sí que Jesús iquia nandererecua ra. Sã Dios cheẽ mbuchecuaa iquia nyii no, eî sí que Jesús iquia no nda. Ure abe mombo no. Judíos icuã tuchi que ùquî nda. ã eicuãte riqui Dios je ã. Mbia abe je eicuãte riqui ã no. Mbia ja je. ¹⁶—¿Mbaerã nda jêso Dios cheẽ nenei nenei Judíos eã je re? i que equia ure je ra. Ureriquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacuã eicuã si. Judíos que urecheẽ siquisã quisã ño nguia ra. Judíos que huiicuã saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷Seresenda, ishote urecu jësi a. Nyebe ureya eãte riqui nguiã jendese ã. Uremaese rete quia jendese ã. Urendua beite quia jendese ã. ¹⁸Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguia ra. ¹⁹⁻²⁰Jesucristo ra tu si nyebi nanderea. Seya tuchi aico eraarõ arõ a. Jê nguia uremombia mbia beite nguiã ùquî. Jêchî Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jëisi turã nda. Nyebe ra Jesús ia tuchi urerese eru mose.

3 ¹—Tairandu tuchi rã erese, ure tuchi que equia jeniî nda. Urendua ndua tuchi que equia jendese ra. Nyebe ure ae ureico nguiã Atenas. ²Nyebe que Timoteo amondo rei nguiã jendea. Jirandu sacuã jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacuã Jesús rese ra. ³Timoteo que amondo jendea ra. Ì nda jêhui eã Dios cheẽ si mbia icuã mose jêje. Mbia icuã tuchi que eriqui jêje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguiã nande je. ⁴Ureico que equia jendese nyii, aque mose que ureico rei ñee jêje resê. —Mbia icuã tuchi ra eriqui nande je, ure rei que equia jêje nyii resê. ¡Sã ngasê cote jê! ¡Sã mbia icuã icuã nande je cote jê! ⁵Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacuã. —¡Quiatu Jesús quiato rea jê! Siqui bei rei equia Jesús rui reae. Aba mbiîrî irîsa embiicuã eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶Ae que Timoteo tu jësi cote ra. Ñee turâte que u jeniî nda. —Hue que echi Dios icua tuchi ra. Hue que echi nyesecua tuchi Dios rese ra. Nande

abe rese que echì nduate huee ra. Eyayãte eriqui rei nanderese, i que Timoteo u urembiirandu jeniì nda. Ure abe ureyayãte riqui jendese ã. 7—Hue que echì Dios icua tuchi ra, i mose que ureya tuchi ra. Mbia icuãte raque ure je. Seresenda, jẽ urembiate quia ùquĩ. 8Ureya tuchite jendese, jẽingo bei mose nandererecua rese. 9Dios urembia tuchite quia jendese co. Nyebe ureico nguiã gracias i ee co. 10Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeniì nda. Ì nda jembaaquiatu ji jẽingo tuchi Dios rese.

11Dios rei nanderu. Jesucristo rei nandererecua. Ûquĩ je ureico ñee tuchi ã. Urererao sacua jendea. 12Sã nandererecua jembuchesequa tuchi jenyiese. Mbia ja rese. Sã ureico nyesequa tuchi jendese no. Eĩ jenye si chõ nguia nyesequa mbia rese jẽ abe no. 13Ì nda Cristo quirãcuã mee jẽje. Ì nda Cristo jemingo icúe umbaerã tuchi. Ì nda jemingo turã mbei Dios rese. Jesucristo tu mose chee ibate si. Mbia ra ñee icuã aroneate jeniì cote. Ñee icuã aroneate ra Dios je jeniì. Jesucristo tu mose ra Dios mae jeturã ndese. Jesucristo ra tube quiato ja rese.

Jẽingo turã, i Dios mbia je

4 1Serenda, tacheẽ tuchi jẽje. Jesús cheẽ ngue uresenei senei tuchi quia jẽje ra. Ûquĩ ndui chõ jẽingo turã ndei nguiã ùquĩ. Jẽingo i i tuchi quiato erui jẽ. Ì nda Dios ia tuchi jendese. Secheẽ ae eã ño ã nde. Jesucristo cheẽ ño ñene. 2Nandererecua tuchi chõ Jesús re. Ae chõ urembucheẽ nguiã jẽje. Ae cheẽ si jẽingo tesarei ãte ùquĩ. 3Dios jemingo sete quia icúe umbaerã co. iEmo ninisi rese ra jẽingochĩ jẽ! iEru eã mo ndese abe ra jẽingochĩ jẽ! 4iJeninisi ae rese chõ jẽingo! Jeninisi jendeco turã ño nguia. 5Dios icuasa reã ño mbia ninisi osei osei nguiã ùquĩ. iEĩ jenyechĩ nda jẽ jẽ! 6iJenongue ra jembĩrĩ irichĩ eninisi rese jẽ! Ûquĩ naa naa mose ra Dios jembasi tuchi. Nyebe urecheẽ nguiã jẽje nyii. 7—Jẽingo turã icúe sembaerã, i que Dios nande je ra jẽ. —Jẽingo icuã icuã, iã equia nande je co. 8iUrecheẽ jẽisi turã ño nguia jẽ! Jẽ urecheẽ isiã mose, eĩ jenye chõ nguiã Dios ucuayã. Urecheẽ achõ eã ño uresenei senei nguiã jẽje. Dios cheẽ ño ñene. Dios sí que Espiritu Turã mondo nande je ra.

9—Jenyesequa jenyiese, aeã nda jẽje cote. ¿Mbaerã nda acheẽ jẽje re? Dios que ñee jẽje no. Nyebe jẽingo nguiã nyesequa jenongue rese ùquĩ cote. 10Macedonia jenda rese jẽingo nyesequa ùquĩ. Jesús quiato rese. Jenyesequa i i tuchi jiri erese jẽ. 11iJẽingo turã ño nguia jẽ! iJeñĩmbecoteã ño nguia jembae rese jẽ! iJẽquiei quiei bei equia jẽ! Ûquĩ ngue urecheẽ jẽje nyii resẽ. 12Ûquĩ naa mose ra Jesús icuasa reã ñee turã turã jẽje. Ûquĩ naa mose ra mbae tiã eã jẽje no.

Jesús ra tu nyebi íbii

13Mbia raaque rese taembiirandu rã. Ì nda jẽyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —

Quera si na nye. Nandemae si na erese re, i eã ño Jesús icuasa reã nguiã mbia raaque je ùquĩ. ¹⁴Jesús que mano ndei nguiã nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ûquĩ nandeicuate quia ã. ¹⁵Nandererecua Jesús cheẽ uresenei senei nguia jêje ã. Jesús ra tube íbii. Aque mose ra mano je rane nyoi erea. Ae nandereco nandeico ã nae, ùquĩ abe ra nyoi erui cote. ¹⁶Cristo ra tu nguichi ibei si. Ererecua rã nda eru ñee mbia je. Angel nderecua ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ûquĩ nane nda quera si. ¹⁷Aquere ra nandereco rerao ùquĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸Ã ndei Dios cheẽ ã. Jeñimundua ndua bei quia erese. Ì nda jêya tuchi erese.

Jêquiche je na Jesús ru chã

5 ¹—Aque mose ra Jesús ru, ae eã nda jêje, Seresenda. ²Isa chõ mbae mbuquiachãsa riqui nguiã tu. Mbia ndua eã mose ra eru. Eĩ si ra Jesús u, mbia ndua eã mose erese. ³—Ureico turãt e quia ã ndesẽ, i ra mbia. Ajee tuchi ra Jesús ru aque mose. Mbia mbutiã nonde cote. Sã nanĩmbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴Jê nguia jêingo ãte nguiã itondaru ùquĩ, Seresenda. Jêaquiatuã eã ño jê nde. Jê nguia ra Jesús jembua eã u. Mbae mbuquiachãsa rã eã nda eru jêje. ⁵Nyaashĩ na ño jêingo nguiã jê ja ùquĩ. Itondaru rã eã ño nandeico nguiã nande ã. ⁶Nyebe nandechumumba rã mbei chõ nandeico nguiã tesa. Mbia ataque quiarei uque bei. ⁷Ae uque quia, ùquĩ ño uque nguiã itondaru. Ae quiacua quiacua quia, ùquĩ ño quiacua nguiã itondaru. ⁸Nyaashĩ jenda chõ nande re. Nyebe nandechimbaaracua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ûquĩ nandeicuate quia ã. Nyebe ra mbae icuã ocoã nanderese. ⁹Nandembasi sacuã eã ngue Dios nandeirabo ra. Nanderirõ sacuã eicuã si chõ ngue nandeirabo nguia. Jesucristo riĩ nda nanderirõ eicuã si. Jesucristo rei nandererecua. ¹⁰Ae que mano nande je ra. Nandeico sacuã erese. Tu ra nandererao siqui sacuã erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹Ã ndei Dios cheẽ ã. Jê ño jeñimundua ndua nguiã erese ùquĩ. iÛquĩ jêsaã saã mbei quia jê!

Pablo embaaquiatu

¹²Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatu quiatuchĩ equia ùquĩ. ¹³Nyebe

jëingo turã ño nguia ee. Jenyesequa tuchi quia erese. Jembaaquiatu quiatu sacua ño ùquĩ nde. iJëingo turã ño nguia jenyue! ¹⁴Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ùquĩ jemingobe erese. Ae equirãcuã neate, ùquĩ jembirãcuã. Jëingo mingue chõ nguia mbia ja je. ¹⁵Mbia icuã mose jëje ijëicuã eã ño ee jë! iJëingo turã ño jenyue jë! iJëingo turã ño mbia ja je no jë! ¹⁶Jëya bei jëingo. ¹⁷iJënee ñee mbei quia Dios je jë! ¹⁸Gracias, jeny quia Dios je mbae ja riĩ. Ebi tuchi quiarei ùquĩ. Jesucristo icuasa chõ jë nde. ¹⁹Espíritu Turã nda jësiquisãchĩ jë. ²⁰Dios cheẽ mbuchecusa cheẽ jëñandu turã ño nguia jë. ²¹—Ma ñee ñooñoa, jeny tuchi quiatu eicua jë. Ñee ñooño eã mose, erui jëingo. ²²iMbae icuã ja rese ra jëingochĩ jë! ²³Aba mombiasa chõ Dios riqui nguia co. Sã ae si jemingo icúe umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote. ²⁴Ūquĩ nda Dios saã ja jëje. Ae quiarei ichõiñosa reã tuchi.

Pablo ñee hui bei

²⁵Jeñee mbei quia Dios je ureriĩ, Seresenda. ²⁶Mbia nanderesenda jëquiaam a ama ja ure je hue jenda. ²⁷Ã sechimbesa jësenei ja rã nandenongue hue jenda je. —Jësenei na, i Cristo quia jëje co. ²⁸Jesucristo rei nandererequa. Sã ae riqui siqui turã mbei jendese. Amén.